



09. April 2019

UPA 2019/53

Atassut

Aqqaluk Heilmann

**Arnat naartusut erninissaannut sapaatip akunneri sisamaannanngortut tagginneqarneraniit naartunermnnut atatillugu sulinngiffeqartalernissaat pillugu Naartunermi, erninermi meeravissiartaarnermilu sulinngiffeqartarneq ullormusiaqartarnerlu pillugit Inatsisartut inatsisaata nr. 14-p, 7. december 2009-imeersup allannguutissaanik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Randi Vestergaard Evaldsen, Demokraatit)

Atassummiit qujavugut siunnersuuteqartumut.

Arnat naartulersimangaagata ernisussiorut ikiortaasaluunniit arnap kingullermik aaqarfiata ullui najoqqutaralugit qaqqugu erninissaannut ullut missingersorneqartarput, kiisalu meeqqap arnaminaavata suli iluaniilluni uummataa tillerneqaleraagat aamma ersarinnerulerlartarluni missigiunneqartoq.

Ilaatigullu piffissaq sioqquttingaatsiaqalugu inuusoqarsinnaasartoq aamma tamatta ilisimaarivarput.

Ullumikkut sinerissami arnat ernisussiorneqarsinnaanngitsut aallarunneqartarput piffissaq sioqqutigaatsiaqalugu, isumannaallisaarinerup iluani tamanna atuuppoq.

Naalakkersuisup siunnersummut akissuteqarnermini ersarissaraluarpaar arnat erniartorlutik aallarunneqarfianit erninersiuteqalererup aallartittarfissaa.

Atassummiit ersarissumik oqaatingerusupparput, inuit ullumikkut atungarisaannik suli pitsangorsaaqqinniarnitsinni saneqqunneqarsinnaanngilaq angajoqqaat pilersuisussaasut aningaasarsiornermikkut ajunngitsumik inissisimanissaat periarfissaqartissallutigu.

Kiisalu aamma saneqqunneqarsinnaanngilaq Kalaallit Nunaanni innuttaasut ikiortariaqarfiini pitsaasumik iliuuseqarfifigisassalutigit.

Taamaattumik kialluunniit takorloorsinnaavaa isorliunerusuni najungaqartut brugsen-eqarfiunngitsuni Pisiffimmillu pisiniarfeqanngitsuni, Pilersuisoq unammillerteqarani innuttaasunut akigititai qanoq qaffasitsigisut qanorlu akisunerutigisut, kiisalu nunaqarfinni tunitsiviit matusaqattaartartuni suliffissaqarpianngitsunilu inuuniarneq qanoq oqimaatsigisinnasarnera.

Taamaattumik anaanaq suli nukangasunik aamma meeraqareerluni aallarunneqarsimaguni ataataasup aalisartuusimaguni taassuma aamma inuussutissarsiorsinnaanera soorunami killeqalersinnaasarpoq.

Kiisalu arnaq kisimiittooq imminuinnaq isumagisoq aamma naartulersimaguni taamatulli ippoq.



Atassummiit pingaartipparput inuit timikkut tarnikkullu tamatta peqqinnartumik inuuneqarnissarput sumi najungaqarnerput apeqqutaatinnagu.

Arnat naartusut erninissaminut ulluliussatut missingiunneqarsimasoq qaammat ataaseq sioqqullugu erninersiuteqalersinnaanera tamanut pitsaanerpaajusinnaasoq kialluunniit apeqqusorsorsinnaanngilaa.

Apeqquataatinnagu aallarunneqartariaqanngikkaluarpat aallarunneqartariaqassagaluarpalluunniit, arnat tamarmik assigiimmik pineqartariaqarput nunatsinni.

Uanimi arnaq kisimi pineqanngilaq, aamma ilormiua meeraq pineqarpoq taanalu aallaaviulluni.

Atassummiit isumaqarpugut una suliassaq peqqissaarullugu eqqartoqqinnejartariaqartoq nalilersoqqillugulu.

Naleqqunnerpaamut ukiullu atortikkumaagassaannut inunnulu pineqartussanut tamanut naleqquttumik inatsisit tunngavigineqartussat inissinneqartariaqarmata tamanut pitsasumik.

Siunnersuut ataatsimiitaliamut ingerlatinneqassasoq innersuupparput, tassani eqqartorneqaqqinnissaa siunnerfigalugu.